

## 每週經課朗誦經文(巴克禮漢羅/教羅)2013/11/24

### 共同經課 - 1 耶利米書二十三章一節~六節

1 耶和華講，牧者殘害我 ê 草場 ê 羊，hō伊四散；in 有災厄 ah。2 所以以色列 ê 上帝耶和華責備 hiah-ê 養飼我 ê 百姓 ê 牧者，án-ni 講，Lín phah 散我 ê 羊群，來趕 in 去，無看顧 in；看 ah，我 beh 照 lín 所行 ê pháit 來辦 lín；這是耶和華講 ê。3 我 beh 聚集我 ê 羊群所 chhun-ê，tùi 我所趕 in 到 ê tàk 國；chhoā in koh tò 來 in ê 寮，hō in 生炭 choē-choē。4 我 beh 設立牧者治理 in，養飼 in；hō in 無 koh 驚惶 gông-ngiáh，亦無減少；這是耶和華講 ê。5 耶和華講，日子 beh 到，我 beh kā 大衛興起義 ê 枝；伊 beh 做王來治理；行 tāi-chì 有智慧，tī 地上行公平 kap 公義。6 當祂 ê 日，猶大 beh 得 tiòh 救；以色列 beh 安然 khiā 起；祂 ê 名 beh 稱做耶和華咱 ê 義。

### 共同經課 - 2 路加福音一章六十八節~七十九節

68 Tiòh o-ló 主，以色列 ê 上帝，因為伊有看顧伊 ê 百姓來贖回伊；69 替咱興起拯救 ê 角，Tī 伊 ê 奴僕大衛 ê 家。70 照伊 tùi 有世間以來用伊聖 ê 先知 ê 嘴所講 ê，71 就是救咱脫離對敵 kap 見若怨恨咱 ê 人 ê 手，72 來行憐憫 tī 咱 ê 列祖，來記念伊聖 ê 約；73 就是 kap 咱 ê 祖亞伯拉罕所 chiū ê choā，74 Hō咱已經脫離 chiah-ê 對敵 ê 手，75 一世人 tī 伊 ê 面前用聖用義無驚來服事伊。76 嬰 á ah，你也 beh 稱做至高 ê ê 先知，因為你 beh 行 tī 主 ê 面前來備辦伊 ê 路，77 Hō伊 ê 百姓 tùi 得 tiòh 赦罪，就知拯救 ê 恩，78 為 tiòh 咱 ê 上帝憐憫 ê 心，Tùi án-ni hō早起時 ê 日 tùi 頂面來到 tī 咱，79 來照 hiah-ê 坐 tī 烏暗 kap 死蔭中 ê 人，Chhoā 咱 ê 腳入平安 ê 路。

### 共同經課 - 3 歌羅西書一章十一節~二十節

11 koh 照伊榮光 ê 氣力，用 tàk 樣 ê 權能 hō lín 有權能，致到 lín 凡事歡喜吞忍寬容；12 koh 感謝父，因為伊 hō咱堪得有份聖徒 ê 業 tī 光明 ê 所在；13 伊已經救咱脫離烏暗 ê 權勢，來搬徙咱入伊所疼 ê Kiá<sup>n</sup> ê 國；14 tiàm-tī 伊咱得 tiòh 贖回，就是咱 ê 罪赦免；15 伊是 boē 得 thang 看見 ê 上帝 ê 像，伊是頭一個生 ê，tī lóng 總受創造 ê 事先；16 因為萬物 tī 伊來創造，tī 天裡 kap tī 地裡 ê，有 thang 看見 kap 無 thang 看見 ê，或是座位 ê，或是治理 ê，或是辦正事 ê，或是掌權 ê，萬項有 lóng 是 tùi 伊，也為 tiòh 伊，chiah 受創造。17 伊 tī 萬項有 ê 事先；萬項有 tiàm-tī 伊來 sa<sup>n</sup>-kap khiā 在。18 伊是身軀 ê 頭，身軀就是教會；伊是源起頭，tùi 死人中起來 ê 頭一個生 ê，hō伊 tī 萬項有中做第一。19 因為父歡喜 hō一切 ê 豐盛 tiàm-tī 伊；20 已經將伊十字架 ê 血來成就和平，就 tùi 伊 hō萬項有 kap 伊本身 koh 再和，或是地上 ê，或是 tī 天裡 ê，lóng 是 tùi 伊。

### 共同經課 - 4 路加福音二十三章三十三節~四十三節

33 到一所在名叫頭殼碗，就 tī hia 釘伊 tī 十字架；koh 釘 hiah-ê 犯人，一個 tī chia<sup>n</sup>-pêng，一個 tī tò-pêng。34 耶穌講，父 ah，赦免 in，因為 in 所做 ê，in m̄知。人就 liam-khau 分伊 ê 衫。35 Hiah-ê 有司譏刺伊講，伊 bat 救別人；若是做上帝 ê 基督，受揀選 ê，tiòh 救家己。36 兵丁也戲弄伊，近 oá 用醋 hō伊，37 講，你若是猶太人 ê 王，tiòh 救家己。38 Tī 伊 ê 頂面有斬條寫講，chit-ê 是猶太人 ê 王。39 受吊 teh ê 犯人一個褻瀆伊，講，你 Kiám m̄是基督 mah？Tiòh 救家己 kap 阮。40 第二個應來責備伊，講，你既然同受罪，連上帝也 m̄驚 mah？41 咱受罪是公道；因為咱所受 ê 合 tī 咱所行；但是 chit 人所行 ê，無一項 m̄ tiòh。42 就講，耶穌 ah，你 tī 你 ê 國來 ê 時，tiòh 記得我。43 耶穌就 kā 伊講，我實在 kā 你講，今 á 日你 beh kap 我 tī 樂園。